



## SULERIAASISSAQ

### Kommunalbestyrelse

#### Kommunalbestyrelsip ataatsimiittarneri.

§ 1. Kommunalbestyrelsip ataatsimiinneri tamanut ammasuupput. Kommunalbestyrelsilli aalajangersinnaavaa suliassat ataasiakkaat matoqqasumik suliarineqassasut, kommunit aqunneqarnerat pillugu inatsisartut inatsisaat nr. 29, 17. november 2017-meersoq tulliini aqutsineq pillugu inatsimmik taagorneqartumi § 9 naapertorlugu.

Imm. 2. Suliassat makkua suliassani ataasiakkaani kommunalbestyrelse allatut ittumik aalajangiisimangippat - matoqqasumik suliarineqartassapput:

1. Suliassat, inunntut ataasiakkaanut tunngasunik naliliisoqassatillugu
2. Suliassat illusinermut imaluunniit tunisinermut tunngassuteqartut
3. Missingersuutit imaluunniit neqeroorutit sanaartornermut tunngasut, sullissinerit tunniutassallu

Imm. 3. Kommunalbestyrelsip kommunimi atorfillit suliassani matoqqasumik suliarineqartussani najuunnissaannut pisinnaatissinnaavai. Kommunalbestyrelsip inuit allat suliani matoqqasumik suliarineqartussani najuunnissaannut pisinnaatissinnaavai, taamaaliornissaq suliassap paasisaqarfigineqarnissaanut pingaaruteqarsimappat, aqutsineq pillugu inatsimmi § 9, imm. 2 naapertorlugu.

Imm. 4. Paasissutissanik matoqqasumik ataatsimiinnermi eqqartorneqarsimasuni, sulianiluunniit allani nipangiussimasassat avammut ingerlateqqinnissaat inatsisitigut nipangiussimasussaataitanermik inatsimmi aalajangersakkatigut nipangiussimasussaataitanermi killiliivigineqarput. Nipangiusimannittussaataitaneq kommunimut allanulluunniit matoqqasumik suliarinninnermut sunniuteqarsinnaasut atuunnerat tamaat atuutissaaq.

Imm. 5. Suliassap matoqqasumik oqaluuserineqarnissaanut tunngavissaqarnerasoq pillugu apeqqut matoqqasumik oqaluuserineqassaaq, tamanna kommunalbestyrelsimit imaluunniit borgmesterimit aalajangerneqarpat, aqutsineq pillugu inatsimmi § 9, imm.1 naapertorlugu.

Imm. 6. Suliassat matoqqasumik ataatsimiinnermi suliarineqartut ajornartinnagu kingulliullugit suliarineqartassapput.

Imm. 7. Kikkulluunniit kommunalbestyrelsip ammasumik ataatsimiinneri, inissaqarunik, najuuffigisinnaavaat aammalu eqqissimasumik torersumillu tusarnaartuusinnaagunik. Tusarnaartoq oqallinnernik akornusersuippat borgmesterip taanna aneqqusinnaavaa, pisariaqarsoriguniulluunniit tusarnaartut tamaasa aneqqusinnaallugit. Borgmesterip tusagassiortut aallartitaasa immikkut ittumik inissaqartinneqarnissaat inniminnersinnaavaa.



Imm. 8. Kommunalbestyrelsip, kommunalbestyrelsip ammasumik ataatsimiinnerisa TV-kkut aallakaatinneqarnissaat imaluunniit radiukkoortinneqarnissaat akuerisinnaavaa.

Imm. 9. Ukiup naatsorsuusiorfiusup naannginnerani kommunalbestyrelse pilersaarusiussaaq kommunalbestyrelsip ukiumi tullermi ileqquusumik ataatsimiittarnissai pillugit.

Imm. 10. Kommunalbestyrelsip ukiup tullianut ataatsimiittarnissaminut pilersaarutini ukiut naatsorsuusiorfiusut aallartinneri tamaasa kommunip nittartagaatigut tamanut nalunaarutigalugit saqqummiuttassavai. Ataatsimiittarnissanut pilersaarutit tamatuma peqatigisaanik Naalakkersuisunut nassiunneqartassapput, aqutsineq pillugu inatsimmi § 8, imm. 1 naapertorlugu.

Imm. 11. Immikkut ittumik ataatsimiittoqartassaaq taamaaliortoqarnissaa borgmesterip pisariaqarsorippagu imaluunniit ilaasortat ikinnerpaamik pingajorarterutaasa tamanna piunasaqaatigippassuk. Nalunaarut imm. 10 naapertorlugu allaqqanerasut pissaaq, tamannalu pillugu Naalakkersuisut ilisimatinneqassapput, aqutsineq pillugu inatsimmi § 8, imm. 3 naapertorlugu.

#### **Kommunalbestyrelsimut ilaasortat ataatsimeeqataasinnaajunnaarnerat.**

§ 2. Ilaasortaq kommunalbestyrelsip ataatsimiinnissaanut peqataasinnaajunnaarsimaguni tamanna borgmesterimut allakkatigut nalunaarutigissavaa ugguuna [kommuneqarfik@sermersooq.gl](mailto:kommuneqarfik@sermersooq.gl), kommunalbestyrelsimut allatsi CC-ikkut ilanngunneqassalluni. Peqataasinnaanani nalunaarneq sapinngisamik piaartumik pissaaq, kingusinnerpaamillu ataatsimiinneq ullunik marlunnik sioqqullugu, peqataasinnaannginnermut patsisaasoq tamannalu qanoq sivisutigissanersoq ilanngullugu nalunaarutigineqassaaq. Ataatsimiinnerit ataasiakkaarlugit aalajangiinernit imaqarnilianut tamatigut allanneqartassaaq ilaasortat kikkut peqataasinnaasimanginnerisut sinniisorlu sorleq peqataaratarsimanersoq.

Imm. 2 Ilaasortaq kommunalbestyrelsip ataatsimiinnissaani napparsimanini, naartunini, erninini, meeravissartaarnini, inuiaqatigiinni sullissisussaataalluni pisussaaffiligaanini, inuutissarsiutiniassigisaalluunniit pissutigalugit ataatsimeeqataasinnaajunnaarpat ilaasortap pisinnaangitsupqinigaqaatigisimasaasa, aamma kisimiillutik qinigassanngortissimasut, piunasarisinnaavaat sinniisussapataatsimiigiaqquneqarnissaa, aqutsineq pillugu inatsimmi § 15 naapertorlugu.

Imm. 3. Kommunalbestyrelsip aalajangertassavaa sinniisussap ataatsimeeqataanissaanut piunasaqaatit naammassineqarsimanersut, aqutsineq pillugu inatsimmi § 15, imm. 3 naapertorlugu.

#### **Kommunalbestyrelsimut ilaasortat iliuseqarsinnaatitaanerat.**

§ 3. Kommunalbestyrelsimut ilaasortaq kinaluunniit kommunip susassaarfii pillugit kommunalbestyrelsimut suliassanngortitsisinnaavoq, aqutsineq pillugu inatsimmi § 13 naapertorlugu. Oqaluuserisassanngortitsineq § 4 naapertorlugu pisassaaq. Suliaq



oqaluuserisassanngortinneqarpat, § 8 naapertorlugu suliap suliareqqinnissaa pillugu kommunalbestyrelse ataatsimiinnermi aalajangiissaaq. Tamanna aamma suliaq aalajangiiffigisassatut siunnersuutaagaangat atuutissaaq.

Imm. 2. Ilaasortap suliamik oqaluuserisassanut ilanngussinissamik kissaatigisaanik Kommunalbestyrelse itigartitsissinnaavoq, suliaq siusinnerusukkut kommunalbestyrelsip sularisimasaanut assingusuuppat. Itigartitsinerli pisinnaangilaq suliami paasissutissanik nutaanik peqarpat, imaluunniit oqaluuserineqarnerani kingullermi tunngaviatigut annertuumik allannguuteqartoqarsimappat.

Imm. 3. Suliami paasissutissat kommunalbestyrelsimullu inassuteqaateqarnissaaq eqqarsaatigalugit, kommunalbestyrelsip tulliani ataatsimiinnissaa sioqqullugu, ilaasortamit siunnersuutit sapinngisamik piffissaalluartilugit Pisortaqatigiit Allatseqarfiannut tunniunneqartassapput. Ilaasortap ataatsimiinnissaaq kingusinnerpaamik ullut 14-it sioqqullugit suliamik allakkatigut oqaluuserisassanngortitsisimanera naapertorlugu, suliaq Borgmesterimit ataatsimiinnissamut oqaluuserisassanut ilanngunneqassaaq.

Imm. 4. Kommunalbestyrelsimut ilaasortaq kinaluunniit kommunip susassaarfii pillugit apeqquteqaateqarsinnaavoq. Apeqquteqaat naatsuliarineqarsimassaaq ersarissuliarineqarsimassallunilu naatsumillu tunngavilersuutitaqartinneqassalluni. Apeqquteqaat allaganngorlugu apeqquteqaatineqassaaq Pisortaqatigiit Allatseqarfiannut tunniunneqassalluni.

Pisortaqatigiit Allatseqarfianit apeqquteqaat ingerlatsivimmi pisortamut susasaqartumut ingerlateqqissavaa, taassumalu nalilissavaa apeqquteqaat allaffissornikkut akissuteqarfigineqarsinnaanersoq. Apeqquteqaatit allaffissornikkut akissuteqarfigineqarsinnaasut akissuteqarfigineqassapput sapinngisamik ullut 14-it qaangiutsinnagit.

Apeqquteqaat akissuteqarfigineqarsinnaanngippat apeqquteqaat akissuteqarfigiumallugu ataatsimiititamut susasaqartumut ingerlateqqinneqassaaq.

Apeqquteqaatit allaffissornikkut ullut 14-it qaangiussimatillugit akissuteqarfigineqarsimasut ataatsimiititanullu susasaqartunut akissuteqarfigiumallugit ingerlateqqinneqarsimasut pillugit, apeqquteqaateqartoq ilisimatinneqartassaaq.

Apeqquteqaatip assilinera kiisalu akissuteqaatip assilinera nassiussinermi kommunalbestyrelsimut ilaasortanut tamanut nassiunneqassapputaaq.

Apeqqutit akissutillu kommunip nittartagaani saqqummiunneqassapput. Apeqqut imaluunniit akissut paasissutissanik isertuuttariaqakkanik imaqarpat, apeqqut akissutaalu tamanut saqqummiunneqartassanngillat, taamaallaalli kommunalbestyrelsimut ilaasortanuinnaq nassiunneqartassallutik.

Imm. 5. Kommunalbestyrelsimut ilaasortaq kinaluunniit qinikkatut sulinerminut atatillugu suliassap aalajangersimasup taamatut isikkoqarluni inerneranik kommunip allaffeqarfiani inissisimasumik misissuilluni aqusaartuisinnaatitaavoq, aqutsineq pillugu inatsimmi § 12 naapertorlugu.



Suliami aalajangersimasumi takunnissinnaatitaanermik piunasaqarneq toqqaannartumik Pisortaqtigiit Allatseqarfiannut nassiunneqassaaq.

Aqutsinermut inatsimmi § 12 naapertorlugu suliamik takunnissinnaasoqarnersoq Pisortaqtigiit Allatseqarfiata/Borgmesterip ingerlatsivik pineqartoq suliap qanoq ingerlanerani paasiniaaffigissavaa.

Borgmesterimit ilaasorta qakineqassaaq piunasaqarneq akuerineqarsimanersoq imaluunniit itigartinneqarsimanersoq, itigartinneqarsimappallu suna tunngavigalugu itigartinneqarsimanersoq.

Piunasaqarneq akuerineqarpat, ullut suliffiusut arfineq-pingasut iluini suliamut atortussat allaffeqarfimmit pissarsiarineqassapput kommunalbestyrelsimullu ilaasortamut pineqartumut nassiullugit. Ingerlatsivimmi pineqartumi Kommunalbestyrelsimut ilaasorta qakineqatigiissuteqarnikkut nammineerluni takuniaasinnaanera paasissutissanik takunninnissamut naapertuuttut nalilerneqarpat.

#### **Oqaluuserisassat nassiunneqartarnerat suliallu saqqummiunneqartarnerat.**

- § 4. Suliat isummerfiginissaannut ileqquumik ataatsimiinnissaq ulluinaat sisamat sioqqullugit oqaluuserisassat ilanngussallu kommunalbestyrelsimut ilaasortanit pissarsiarineqarsinnaassasut borgmesterimit inassutigineqassaaq, aqusineq pillugu inatsimmi § 8, imm. 4 naapertorlugu.

Oqaluuserisassat ilanngussallu politikerit elektroniskimik atortorissaarutaatigut politikerinut ataatsimiinnermi paasissutissanik nassiussiviusartumi pissarsiarineqarsinnaassapput.

Aalajangiussassatut siunnersuummik oqaluuserisassat nassiunneqareernerisa kingorna aatsaat nassiussisoqassagaluarpat, oqaluuserisassanullu ilanngunneqarsinnaasumik, tapiliussatut oqaluuserisassanngortinneqassaaq, taannalu oqaluuserisassat nalinginnaasumik nassiunneqartarnerisulli malittarisassat assingi malillugit ilaasortanut nassiunneqassaaq. Tapiliussatut oqaluuserisassat nassiunneqarnerini tamatigut ileqquumik oqaluuserisassani immikkoortup imaluunniit immikkoortut pineqartut pillugit tunngavilersuutaa ilanngunneqartassaaq.

Oqaluuserisassat, oqaluuserisassatut siunnersuutit atortussallu kommunimi allaffeqarfimmit suliarineqarsimasut kalaallisut qallunaatullu suliarineqarsimassapput, ilanngussat allatullu atortussat kommunip avataanit suliarineqarsimasut taakku oqaasii atorlugit suliarineqarsimanerisut saqqummiunneqassapput.

Imm 2. Kommunalbestyrelsimut ilaasortat tamarluinnarmik Borgmesterip Allatseqarfianut saaffiginninnermikkut suliat ilisimatitsissutigineqaannartut pillugit paasissutissanik nassinneqarsinnaapput. Atortussat tamakku ataatsimiinnissaq sioqqullugu kingusinnerpaamik ullut sisamat sioqqullugit ilaasortanut nassiunneqartassapput peqataanillu politikerit suliffianni ilaasortanut tamanut paasissutissiinertalinnik tigoraaannanngortinneqartassallutik.



Imm. 3. Immikkut ittumik ataatsimiinnissamut ataatsimiigiaqqusinermi borgmesteri suliassanik ataatsimiinnermi suliarineqartussanik sapinngisamik annertunerpaamik ilaasortanut ilisimatitsissuteqassaaq.

### **Aalajangiisinnaassuseqarneq.**

§ 5. Kommunalbestyrelse aalajangiisinnaassuseqarpoq ilaasortat ikinnerpaamik affaat peqataappata, aqutsineq pillugu inatsimmi § 11, imm. 1 naapertorlugu.

Imm. 2. Immikkut aalajangersaasoqarsimatinnagu aalajangiinerit amerlanerussuteqarnikkut pisassapput, aqutsineq pillugu inatsimmi § 11, imm. 1 naapertorlugu.

Imm. 3. Borgmesteri, taannalu peqataasinnaatinnagu borgmesterip tullia siulleq (aappaaluunniit), kommunalbestyrelsip ataatsimiinnerinik siulersuisarpoq. Suliarineqartut siulersorneqarneranni apeqqutini tamani borgmesteri aalajangiisarpoq, ataatsimiinnerullu torersumik ingerlannissaa nakkutigissallugu. Taamatuttaaq oqaluuserisat immikkoortui taasissutigineqartussat oqaasertaliiffigisassavai.

Imm. 4. Kinaluunniit oqaaseqarusuttoq borgmesterimut saaffiginnissaaq, taassumalu oqaaseqarumallutik nalunaartut tulleriinneri malillugit oqaaseqartittassavai. Partiinilli oqaaseqarnerit partiit angissusii malillugit tulleriinneqassapput. Arlallit oqaaseqarumallutik ataatsikkut nalunaarpata borgmesterip aalajangertassavaa qanoq tulleriinneqarlutik oqaaseqassanersut.

Imm. 5. Ilaasortaq kinaluunniit pisariaqartitsineq naapertorlugu torersuunissamik borgmesterip aalajangiinerinik malinnittussaataavoq. Ilaasortaq ataatsimiinnermi ataatsimi marloriarluni torersumik pissuseqaqquneqarsimappat kommunalbestyrelse, borgmesterip siunnersuuteqarneratigut, ilaasortamik, ataatsimiinnermi tassani oqaaseqaqqusiunnaarsinnaavoq.

Imm. 6. Oqaluuserinninnermut atasumik siunnersuutit tamakkerlutik borgmesterimut saaffiginnissutigineqartassapput. Borgmesterip tamanna pisariaqartippagu, imaluunniit ilaasortat 3-t qinnutigippassuk, oqaluuserinninnerup naammassisutut isigineqartariaqarnera taasissutigineqassaaq, ilaasortat tamatumingna kissaateqartut tamarmik ataasiarlutik oqaaseqareerpata.

Imm. 7. Borgmesteri apeqqutini taassumangga aalajangiiffigisassaataasunik kommunalbestyrelsimit aalajangiiffiginnitsitsisinnaavoq.

### **Ataatsimiinnermik siulersuineq.**

§ 6. Suliassat borgmesterip aalajangiineratut tulleriinnilerlugit suliarineqartassapput. Taamaalisoqartillugu ullormut oqaluuserisassat tulleriinnerat borgmesterip malitsinngitsoorsinnaavaa.



Imm. 2. Kommunalbestyrelsili aalajangiissaaq suliassat qanoq tulleriinneqarlutik suliarineqassanersut pillugit, tamanna ilaasortat 3-t taasissutigineqarnissaat piumasaaqatigippassuk.

Imm. 3. Kommunalbestyrelse aamma aalajangersinnaavoq ullormut oqaluuserisassanut ilaanngitsunik suliassanik allanik ilanngussiumalluni, taakku utaqqisinneqarsinnaanngippata nalornissutissartaqanngippataluunniit.

Imm. 4. Kommunalbestyrelsimi isumaqatigiilluni suliat allat suliarineqarnissaat akuerineqarsinnaavoq, taakku oqaluuserisassatut siunnersuummi ilaanngikkaluarpataluunniit.

Imm. 5. Ilaasortaq kinaluunniit ataatsimiinnerup aallartinnerani oqaluuserisassamik oqaluuserinninnissamik qinnuteqarsinnaavoq, taakkununga ilaallutik apeqqutit suliassat matoqqasumik ataatsimiinnermit ammasumik ataatsimiinnermut, imaluunniit paarlattuanik, nuussinissaq siunertaralugu.

#### **Suliassat saqqummiunneqarnerat.**

§ 7. Suliassap ataatsip ataasiaannarlugu suliarineqarnissaa pisariaqarpoq, inatsisiliornermi immikkut ittumik allatut aalajangiisoqarsimangippat, imaluunniit kommunalbestyrelsip isumaqatigiissutigisimappagu marloriarluni suliarineqassasoq. Kommunimi aqutsinnermut ileqqoreqqusat aqutsineq pillugu inatsimmi § 1 naapertorlugu marloriarluni suliarineqartassaaq, soorluttaaq ukiumut missingersuutit marloriarlugit suliarineqartussaasut.

Imm. 2. Siullermeeraluni oqaluuserinninnermi suliap suussusia taasissutigineqassanngilaq, taamaallaat aappassaaneerlugu suliassatut ikaarsaartinneqarnissaanik apeqqut. Suliamut saqqummiunneqartumut, kommunalbestyrelsimi suliassap aappassaaneerlugu suliarineqarnissaanut ikaarsaartitsisoqarnissaanik aalajangertoqannginnerani, ilaasortaq kinaluunniit oqaaseqarumanissaminut pisinnaatitaavoq. Siullermeerlugu aamma aappassaaneerlugu suliarinninnerit akornanni sivikinnerpaamik akunnerit 24-it ingerlareersimassapput. Aqutsinissamik ileqqoreqqusap kiisalu ukiumut missingersuutit siullermeerlugit aamma aappassaaneerlugit oqaluuserineqarnerisa akornanni sivikinnerpaamik ullunik 14-inik akuttussuseqartumik suliarineqassapput, aqutsineq pillugu inatsimmi § 1, imm. 2 naapertorlugit.

Imm. 3. Suliassaq marloriarlugu oqaluuserisassanngortinneqarpat tassunga pappiaqqat paasissutissanik imallit siullermeerlugu suliarineqarnerata kingorna suliarineqarsimasut sapinngisamik ilaasortanit takuneqarsinnaasunngorlugit saqqummiunneqartassapput, imaluunniit taakkua akornanni kaajallaasinneqassallutik.

#### **Aalajangiinissamut tunngavissaq.**

§ 8. Suliat taamaallaat kommunalbestyrelsimi oqaluuserineqarsinnaapput, Aningaasaqarnermut Ataatsimiititamit ataatsimiititamillu susassaartumit inassuteqaateqartoqarsimangippat. Kommunalbestyrelse aalajangersinnaavoq suliaq akuersissutigineqassasoq imaluunniit itigartitsissutigineqassasoq imaluunniit suliaq ataatsimiititamut oqaluuserisassanngortinnissaanut innersuussaqaarsinnaavoq. Kommunalbestyrelsip



matumani aalajangersinnaavaa suliassaq, ataatsimiititap aalajangersimasup susassaqarfianut attuumassuteqanngitsoq, ataatsimiititamut ataavartumut innersuussutigineqaqqaassanersoq.

Suliat kommunalbestyrelsip iluani pissutsinut, kommunalbestyrelsimut ilaasortat ivertinneqarnerinut tunuarnerinullu, ataatsimiinnissanut pilersaarutinut, kommunalbestyrelsimut ilaasortat akissarsiaqartinneqarnerinut, ilaasortat inuussutissarsiutiminnit pisussaajunnaartitaanerannut, sinniisunik aggersaasarnernut assigisaannullu tunngatillugu, ataatsimiititanut oqaluuserisassanngorteqqaarneqaratik oqaluuserineqassapput.

Imm. 2. Kommunalbestyrelse isumaqarpat suliassaq aalajangiiffigineqannginnermini ataatsimiititami immikkut ittumi oqaluuserineqaqqittariaqartoq ataatsimiititamik naleqquttumik pilersitsissaaq ataatsimiititalu ilaasortaasa amerlassusissaanik aalajangiilluni, aqutsineq pillugu inatsimmi § 31, imm. 3 naapertorlugu.

Imm. 3. Kommunalbestyrelse allatut aalajangersimanngippat immikkut ataatsimiititaq siulittaasumik nammineerluni qinersisuussaaq. Ataatsimiititaq allatamik borgmesterimut nassuiaasiussaaq, taassumalu taanna kommunalbestyrelsimi ilaasortanut agguaatissallugu.

Imm. 4. Immikkut ataatsimiititap katitigaanissaa kommunalbestyrelsip aalajangissavaa taakkulu suliassaannut malittarisassiussalluni.

#### **Ilaasortat sulianut attuumavallaarsinnaanerat.**

§ 9. Ilaasortat ilaat suliassami aalajangersimasumi inuttut ima soqutigisaqartiginersoq suliassaq taanna pillugu kommunalbestyrelsip oqaluuserinninnerani taasineranilu peqataanngitsoortariaqarnerisooq kommunalbestyrelsip aalajangiiffigissavaa. Taama ittoqartillugu pineqartoq suliaq pillugu isumaqatigiinniarnermi taasinermilu ataatsimiiffimmiit anissaaq taamaattorli suliap pineqartup eqqartorneqarnerani ilaasortaq anissanersoq pillugu kommunalbestyrelsip isumaqatigiinniarnernani taasineranilu peqataasinnaalluni.

Imm. 2. Pissutsinik suliassamut soqutigisaqarnermik apeqqummut nalornissutiginnitsisinnasunuk peqarpat ilaasortap kommunalbestyrelse tamatumingga ilisimatissavaa, aqutsineq pillugu inatsimmi § 14, imm. 2 naapertorlugu.

Imm. 3. Aqutsinermut inatsimmi § 39, imm. 3 naapertorlugu ilaasortaq suliamut attuumassuteqarpallaartut nalunaarpat, kommunalbestyrelsimut qinigaaqatigisimasaani ilaasortat, aammalu ilaasortaq kisimiilluni qinigaasimappat, suleqataasinnaanera, apeqquserneqartoq nammineq sinniisussamik ataatsimiititaliap sulineranut aggersaasoqarnissaanik piumasaqarsinnaavoq.

Imm. 4. Kommunalbestyrelse aalajangiissappat ilaasortaq suliassamut attuumassuteqarluni aalajangeeqataasinnaanngitsoq, taassumalu sinniisussaaq ataatsimiigiqquneqanngippat, ilaasortat pineqartumut qinigassanngorteqataasimasut, pineqartorlu kisimiilluni qinigassanngortittuusimappat ilaasortap nammineq piumasarisinnaavaa suliassap tullianik ataatsimiinnissamut kinguartinneqarnissaa. Taamaattoq kinguartsisoqarsinnaanngilaq ilaasortat najuuttut 2/3-sa tamanna akerlerippassuk, imaluunniit kinguartsinissap



nassatarissappagu piffissarititaasut kommunip malissallugit  
pisussaaffiiqaangerneqassappata.

### Ilaasortat oqaluuserinninnermi taasinermilu peqataasarnerat.

§ 10. Ilaasortat kommunalbestyrelsip isumaqatigiinniarnerni taasinerinilu taamaallaat  
peqataasinnaapput taakkunani nammineerlutik najuunermikkut, aqutsineq pillugu inatsimmi  
§ 11 naapertorlugu.

Imm. 1. Kommunalbestyrelse aalajangersinnaavoq, ilaasortat ilaat naapilluni  
ataatsimiinnermut ilaasussatut telefonikkut videokonferencekkullu peqataasinnaasut, soorlu  
aamma kommunalbestyrelse aalajangersinnaasoq ataatsimiinneq taamaallaat  
oqarasuaatikkuinnaq imaluunniit videokonfereneckkuinnaq ingerlanneqassasoq, aqutsineq  
pillugu inatsimmi § 11, imm. 3 naapertorlugu.

Imm. 2. Kommunalbestyrelsimut ilaasortaq teknologi atorlugu attaveqaatikku  
kommunalbestyrelsip isumaqatigiinniarnerni taasinerinilu peqataasinnaatitaavoq, aqutsineq  
pillugu inatsimmi tamatumunga malittarisassat naapertorlugit, aqutsineq pillugu inatsimmi §  
11, imm. 2 naapertorlugu.

### Taasinerit.

§ 11. Taasinerit pisassapput ilaasortat issiavimminniit nikuinnerisigut, nappaanerisigut, telefonikkut  
toqqaannartumik oqarnerisigut imaluunniit teknologi atorlugu attaveqaatit allat ikiortigalugit  
peqataanerisigut, imaluunniit elektorniskimik taasisutikkut.

Imm. 2. Aalajangiinerit tamarmik taasinermi amerlanerussuteqarnikkut pisassapput,  
inatsisiliornikkut allamik periuseqarnissamik najoqqutassaqaartitsisoqanngippat. Taasinermi  
amerlanerussuteqarneq imatut paasineqassaaq, taasisutigineqartumi pineqartumi taasinerit  
amerlanerussuteqassasut. Taasinermi isumaqataasut akerliusullu amerlaqatigiippata  
ullormut oqaluuserisassani immikkoortoq atortussaajunnaartutut isigineqassaaq (taamaattorli  
takuuk suleriaasissatut aalajangersakkani matumani § 13).

Imm. 3. Borgmesterip aalajangiineratigut allakkatigut taasisoqarsinnaavoq, imaluunniit  
ilaasortap ataatsip tamanna piumasagaatigippagu. Ilaasortanut telefoni videolu atorlugu  
peqataasunut tunngatillugu taakku emailikkut assigisaatigulluunniit taasisinnaapput.

Ilaasortat taasinngitsoornissaminnut pisinnaatitaaffeqarput imaluunniit arlaannaannulluunniit  
attuumangitsumik taasisinnaapput.

Imm. 4. Borgmesteri isumaqaruni kommunalbestyrelsip suliassamut isummenera  
nalorninaatsuusoq taasisutigineqarnissaalu pisariaqarani, taava kommunalbestyrelsip  
suliassamut isummeneranut paasinninnini oqaatigissavaa. Tamatuma kingorna ilaasortat  
arlaannaalluunniit taasisitsinissamik piumasagaateqanngippat borgmesteri  
nalunaaruteqassaaq nammineq paasinninnini naapertorlugu oqaatigisamisut suliassaq  
aalajangiivigineqartoq.





Imm. 5. Allakkatigut qinersisoqassatillugu allagartat qinersiffissat atorneqassapput borgmesterimiillu agguanneqarlutik. Borgmesterip ilimagippagu qinigassanngortitaq aalajangersimasoq imaluunniit qinigassanngortitat aalajangersimasut kommunalbestyrelsimit qinigaaniartut imaluunniit qinigaaqqinniartut, siunnersuuteqarsinnaavoq pineqartoq (-tut) allakkatigut taasinertaqanngitsumik qinigaassasoq (-sut). Tamatuma kingorna ilaasortat arlaannaalluunniit taamatut taasisoqarnissamik piumasaqaateqanngippat qinigassanngortitaq (-tat) qinigaasutut isigineqassaaq (-sapput).

### **Allannguutissatut - aamma allannguutaaqqittussatut siunnersuutit.**

§ 12. Allannguutissatut aamma allannguutaaqqittussatut siunnersuuteqartoqarsinnaavoq taasisitsineq aallartinneqarsimanngippat.

Allannguutissatut- aamma allannguutaaqqittussatut siunnersuutit kommunalbestyrelsip ataatsimiinnerani oqaluuserineqartartunut suugaluartunulluunniit tunngasut pillugit ilaasortamit kimilluunniit saqqummiunneqarsinnaapput.

Suliassat marloriarlugit kommunalbestyrelsimi oqaluuserineqartussat aappassaaneerinissap tungaanut allannguutissatut aamma allannguutaaqqittussatut siunnersuutigineqarsinnaapput. Suliap siullermeerlugu oqaluuserinerani allanngortinneqaratarsinnaanera naatsorsuutigissallugu pisariaqanngilaq.

Imm. 2. Kommunalbestyrelse suliassani marloriarlugit oqaluuserisassani allannguutissatut siunnersuutit saqqummiussinissaminut, aamma pissutsit aallaavigalugit allannguutaaqqittussanik siunnersuutit eqqarsaatigalugit najoqqutassanik akuersissutiginnissinnaavoq. Taamatut pisoqartillugu taakkua piffissaliussap qaangiunneratigut saqqummiunneqarsinnaanngillat, kommunalbestyrelsimi amerlanerussuteqartut tamanna akuersimanngippassuk.

Imm. 3. Allannguutissatut -siunnersuut aamma allannguutigiteqqitassatut siunnersuut aappassaaneerlugu oqaluuserinnineq sioqqullugu ilaasortanut ilisimasassatut tunniunneqarsimanngippat borgmesteri, siunnersuutip oqaluuserineqalernerata aallartinnerani taanna pillugu nalunaaruteqassaaq, tamatumanili apequtaassalluni pappiaranngorlugit tunniunneqarsimanersut. Borgmesterip aalajangissavaa allannguutissatut siunnersuutit qanoq tulleriinnilerlugit taasisutigineqassanersut, imatulli isikkulerlugit, taakkua taasisutigineqarneri siunnersuutip pingaarnerup taasisutigineqarnissaa sioqqullugu pisassalluni.

Imm. 4. Suliap suliarineqarnerani suliaq taanna pillugu isumaqatigiinniarnert naammassineqareerpata suliap taassuma ataatsimiititamut innersuussutigineqarnissaa ilaasortat kikkulluunniit kissaatigisinnaavaat. Taamatut kissaateqartoqarpat isumaqatigiinniarneq naammassippat borgmesterip suliaq ataatsimiititamut attuumassutilimmut innersuussutigissavaa, tamatuma taasisutigineqarnissaa kissaatigineqarsimanngippat. Suliaq pillugu isumaqatigiinniarnert aallarereersut ataatsimiititamut toqqaannartumik innersuussisoqarnissaa siunnersuutigineqarpat isumaqatigiinniarnert unitsinneqassapput tamatumalu kingorna kommunalbestyrelse ataatsimiititami suliarinninnissamut tunngasumik aalajangiissalluni.



Ataatsimiititanut innersuussuteqarnissamut tunngasoq allannguutissatut siunnersuutaasinnaasut pillugit taasisoqannginnerani taasisutigineqassapput.

### **Siulittaasunut ilaasortanik qinersineq il.il. – amerlanerussuteqarnikkut qinersineq**

§ 13. Kommunalbestyrelsip ataatsimiititanut, kommissioninut, siulersuisunut assigisaannullu ilaasortanik qinersisarnera amerlanerussuteqarluni qinersinikkut ingerlanneqartarpoq, aqutsineq pillugu inatsit naapertorlugu § 37.

Amerlanerussuteqarluni qinersinermi qinigassanngortittoq ilaasortanit najuuttunit amerlanerussuteqartunit qinerneqarnerpaaq qinigaassaaq. Qinigassanngortittoq amerlanerussuteqarluinnartumik qinigaanngippat taaseqqittoqassaaq.

*Imm. 2.* Ataatsimiititalianut il.il. ilaasortassanik qinersineq ataatsimiititalianut ataavartunut qinersinerup kingorna ingerlanneqartassaaq. Qinigaaneq kommunalbestyrelsip piffissamut qinigaaffianut atuuppoq.

*Imm. 3.* Aammattaaq kommunalbestyrelse ataatsimiititalianik immikkut itturnik pilersitsisinnaavoq suliassat aalajangersimasut isumagineqarnissaannut imaluunniit kommunalbestyrelsimut, aningaasaqarnermut ataatsimiititaliamut imaluunniit ataatsimiititalianut ataavartunut siunnersuisartussanik. Kommunalbestyrelsip aalajangissavai ataatsimiititaliat immikkut itturnit katitigaanissaat taakkulu sulinissaat pillugit maleruagassat aalajangersassallugit.

*Imm. 4.* Kommunalbestyrelse kommunalbestyrelsimut ilaasortat saniatigut ilaasortanik allanik qinersisinnaapput inatsimmi alla naapertorlugu immikkut akuersissutigineqarsimasoq tassungalu atatillugu kommunalbestyrelsimut suliassanik tunniunneqartunik suliaqarsinnaatitaaneq

### **Ataatsimiititanut ilaasortanik marlunnik amerlanernilluunniit qinersineq – amerlassuseqarneq malillugu qinersineq**

§ 14. Agguaqatigiissitsinikkut qinersineq D'Hondts-ip perusia tunngavigalugu maleruagassat makku naapertorlugit pissaaq: Kommunalbestyrelsimi ilaasortat gruppiinut, taakku qinersinermi pineqartumi taaseqatigiinnissaminnik borgmesterimut nalunaarsimanerattut, agguataarneqassapput. Gruppit ataasiakkaat ilaasortaasa amerlassusaat 1-imik, 2-mik, 3-mik il.il. agguataarneqassapput. Tamatuma kingorna agguataakkat inernerisa takutissavaat, gruppit tulleriiaarneqarnerat, taannalu naapertorlugu gruppit ataasiakkaat ilaasortaaitassatik qinersinnaallugit. Agguaqatigiissitsinermi inernerit marluk imaluunniit amerlanerit naligiippata tulleriinnissaq makitsinikkut kommunaldirektørimut isumagineqassaaq. Gruppit ataasiakkaat ilaasortaaitaqarsinnaanerat naapertorlugu sinniisorisassaasa amerlassusissaat aalajangerneqarpat gruppit erninnaartumik borgmesterimut nalunaarutigissavaat inuit kikkut toqqarsimaneritik. Gruppiit ataatsip sinniisoqarfissaq ataaseq arlallilluunniit ilaasortaaitaqarfigerusunngissinnaavai. Taamatut pisoqartillugu inissat inuttaqanngitsut periusissaq siuliani taaneqartoq naapertorlugu gruppinut allanut agguanneqassapput, aqutsineq pillugu inatsimmi § 36, imm. 4 naapertorlugu.



Imm. 2. Ataatsimiititani, kommissionini, siulersuisuni assigisaannilu ilaasortassat kommunalbestyrelsimi ilaasortat ilaasortaangitsullu akornannit qinerneqassappata, ilaasortat kommunalbestyrelsimit qinerneqartussat agguaqatigiissitsinikkut qinersinermi ataatsimiititanut il.il. immikkut qinerneqassapput. Suleqatigiit ilaasortaaitaqartussat tulleriarlutik kommunalbestyrelsimi ilaasortat ilaasortaangitsulluunniit akornanni toqqaassapput, inissat tamarmiusut inuttalerneqarnissaasa tungaanut, aqutsineq pillugu inatsimmi § 36, imm. 3 naapertorlugu.

Imm. 3. Ataatsimiititanut, kommissioninut, siulersuisunut assigisaannullu, borgmesterip pinngitsoorani ilaasortaaffigisasaanut, ilaasortassanik kommunalbestyrelse qinersitillugu borgmesterip inissaq pissarsiarisaa agguaqatigiissitsinikkut gruppimut kommunalbestyrelsimi borgmesterip ilaaffigisaanut inissanik tunniussanut naatsorsuutigineqassaaq.

Imm. 4. Ataatsimiititami, kommissionimi, siulersuisuni assigisaanniluunniit ilaasorta q kommunalbestyrelsip isumaqatigiinneratigut imaluunniit taasinertaqangitsumik toqqagaappat, tamatuma peqatigisaanik aalajangiisoqassaaq inissaq inuttaqarunnaarpat gruppi sorliup inuttaliivigissaneraa (tak. imm. 6).

Imm. 5. Ataatsimiititami, kommissionimi, siulersuisuni assigisaanniluunniit ilaasorta q kommunalbestyrelsimi gruppimut aalajangersimasumit qinigaalluni ilaasortaasoq qinigaaffiup atuunnerani, ilaasortaajunnaarpat inissaq inueruttoq gruppimut taassumanga inuttaliivigineqassaaq.

### **Aalajangiinnermut imaqarniliaq.**

§ 15. Kommunalbestyrelsip aalajangiineri imaqarniliakkut allanneqassapput. Ilanngunneqartut atuarneqareerpata aalajangiinnerit imaqarniliaq ataatsimiinnerup naanerani ilaasortanit tamanit ataatsimiinnermi peqataasunit atsiorneqassaaq. Ilaasortat taasinerannut allatigulluunniit pissuteqartumik imaqarniliap atsiornertigut pinaasersinnaangillat, aqutsineq pillugu inatsimmi § 16, imm. 1 naapertorlugu. Ilaasortat oqarasuaatitigut ataatsimeeqataasimasut imaqarniliap atsiornissaanut e-mailikkut assigisaatigulluunniit ataatsimiinnerup naanerani nassitsinneqassapput.

Imm. 2. Ilaasortap kialuunniit piumasarisinnaavaa isummani allaasoq imaqarniliamut naatsumik allanneqaqqullugu, sulianilu pisortatut oqartussaasumut allamut ingerlateqqitassani piumasarisinnaallugu taassuma aamma imaqarniliap imaanik ilisimatinneqarnissaa. Ilaasortap taassuma suliap nassiunneqarneranut ilanngussinnaavaa isummernerminut tunngaviuliussani, aqutsineq pillugu inatsimmi § 16, imm. 1 naapertorlugu.

Imm. 3. Aalajangiinnerit imaqarniliaq atsiorneqareerlunilu allaqqissaarneqareerpat borgmesterip ataatsimiinnerup naammassinerata kingorna sapinngisamik qaammatip ataatsip qaangiunnerani imaqarniliap assilinqarnera Naalakkersuisunut nassitutissavaa, aamma matoqqasumik ataatsimiinnermi aalajangiinnerit ilanngullugit, aqutsineq pillugu inatsimmi § 16, imm. 3 naapertorlugu.

### **Borgmesterip aqutsinissaminut pisinnaatitaaffii.**



§ 16. Ilaasortaq kinaluunniit pisussaavoq aqutsinissamik aalajangersakkat qanoq paasineqarnissaannik borgmesterip aalajangiinera utaqqiisaasumik naalassallugu, apeqqulli kommunalbestyrelsip ataatsimiinnissaanut tullermut suliassanngortinneqarsinnaavoq.

§ 17. Suleriaasissaq manna 28. aggusti 2018-imi atuutilissaaq.

Taamaalilluni kommunalbestyrelsimit atuutilersinneqarpoq ulloq 28. aggusti 2018

  
Aasi Chemnitz Narup  
Borgmesteri